

天老神光經

右僕射衛國公李靖修

晉平公問師曠曰凡人出行將兵攻擊勝負命之存亡可預知乎對曰須察北斗之星傍輔也若欲克戰將兵暮不見此輔星不可行也。大凶若有疾不見限期將至平公曰天陰不見將何以明休咎對曰不見當視神光不見神光不可妄動平公曰神光若何對曰常居中於陰闇處以指刺之目皆頭搖指可見其輔星者眾共視之獨不見者是輔已去必大凶夫人身疾病目不見者只在七日內死此道微密可謂獨見之明平公曰善哉乃刻玉版藏之於函常被覽之黃帝曰心動目瞬懸知性命吉凶天之明以日月斗為候人之明以目為候以心為主若能知之全身保命夫鼻目神合於心故先知察之心動目瞬鼻酸神光去者大凶或要知賊人奸人須存神光光青白者奸人黑者賊人凡行心動目瞬鼻酸者即存神光神光去者有賊在前一瞬一里前必有賊可備之凡行至他邑欲止

住者先存神光無光者勿入其舍必有憂傷師曠曰光黃及赤而圓有德有喜白者有伏兵於人有喪青缺者有憂黑者有賊及病兵矣若居坐卧不安且存神光不見須急去凡夜卧要知吉凶可存神光將欲征伐者上觀星象中別神光矣若欲渡水宜可存之不見者不可渡也若出行不見者不可行也若臨食不見不可食若欲飲食時心動鼻酸目瞬光去同伴欲害已慎之若舌動唇瞬光去子欲殺父奴婢殺主心動臍瞬光去子欲害父心動光去肘瞬妾人為賊心動掌瞬光去者賊是親戚心動惕然光去弟欲害兄心動右足下瞬利行左足下瞬公中有事心動頰瞬光去賊是交友心動目瞬光去妻妾與外人私通欲來相害心動光去急離任處又存神光左目有光左路通右目有光右路通兩目皆有可往心動不樂避上下兵有相爭事若目無光耳無故鳴坐者急起行者急走有人欲來相害是為精鬼藏耳左目瞬己身事右目瞬他人事鼻酸耳鳴怪憂至夫上士死

前五日光去鬼亦去凡人鬼藏於鼻鬼藏於口故合於身神光出於目精氣合於神所去之處須謹占之昔軒轅欲崩光去十日周孔皆先五日近代烈士三日而已光藏於目聲藏於耳精藏於陰者而限期將至何為不在耳無聲目無光陰不起其賊主來隨明避之大吉岐伯曰於陰闇處以手掩目存神光青者憂白者兵赤者德黃者喜黑者凶劉根曰光白者亦有德甲乙日主目丙丁日主心戊己日主腹庚辛日主背壬癸日主踵以此日其有心動目瞬存光無者賊欲謀人可備禦之甲乙日心動者賊為人身小而長蒼色好言語丙丁日心動者賊為人壯赤色蓬頭廣頰戊己日心動者賊為人鼠肥肚大不言語髮黃庚辛日心動者賊為人廣眉大鼻能喜言語壬癸日心動者賊為人身長頭小黑色好漁獵若能備之則萬事必成避兵除害天自與之利矣光眉間五日一存命之長遠獨聞之聲為之耳鳴精神不調赤子大驚悲思不樂


欲歸於天以手搏耳赤子還返耳鳴之時即存神光黃帝要秘專行全身保命凡人耳鳴聞叫喚啼呼及雷鼓聲若鼻中聞臭氣腥而並凶可齋誠沐浴暮向本星禹步三呼曰

巨門神子 輕門神子 祿存子 戶錯子

衡不云子 霸治子 大攝子

常以此法言無殃矣若有難使呼其所屬星名云來救我三呼止第一午屬破軍二己未屬武曲三申辰屬廉貞四卯酉屬文曲五寅戌屬祿存六丑亥屬巨門七子屬貪狼

禹步法



老氏云凡人住處宜存光察輔星武曲傍小星也見之則吉不見則凶亦內保百日見之則百日內無官灾口舌患疾死亡故曰保百日若天陰不見輔星者於闇處存光若不見細推求四方尋之每辰及夜常能存之長生

矣



天神覆手神呪用保身護命百年之榮壽非

人勿傳呪曰團團告報四方天地日月此處行岡火急捉取鬼王人人縛勒攝取強邪吾今未覺不得分張騏驎萬隊盡散五方

謹請二十八宿星官三十五星頭上立速速下來在臣傍年逆人符鬼專在此攔截作妖祥星官唯覆斗及縛叛逆人形口云急急急急便覆斗一步一星乾元亨利貞

魁魁魁魁魁魁魁

告玄圖

不哉天道垂範顯乎然不可智知自古人知者其道昌不知者其道亡而況於常倫而已敢不量力度德銘心忘形窮索幽微編為圖籍如列諸掌依此行之至誠必應分位置席一一備載將來君子實而祕之以貽後代勿示凡愚之人得之者回不在於外求修之者

亦不在於他人陰符云宇宙在乎手萬化生乎身凡八萬三千一百畫三千一百星夜八萬星見以四斗星官每夜抽三斗在北斗下當直

乾星求謁至尊宜用月初二日銜宿

紙錢一貼 狀紙七張 鹿脯三條

酒三盞 燈七盞 香一炷

右奉請乾星官降赴領受薄禮以應虔誠謹

狀

離星救危扶傾宜用戌日亥時

燈九盞 香一炷 饌餼五碗

乳五盞

右奉請離星官降臨俯納丹誠以救顛躓謹

狀

丙星祈福宜用酉日申時飯兩碗并匙筋

酒兩盞 雜肉兩椽 狀紙五張

筆一管 燈一盞

右奉請丙星官降臨受納單獻特施福祐謹

平星夷敵宜用危日丑時

酒七盞 香一炷 紙錢三貼

燈兩盞 飯七椀

右奉請平星官降止領受奠禮令過敵必平

逢危返安謹狀

寅星官攻擊勝負宜用定日子時

酒三盞 香三炷 紙錢一貼

羊肉三椀 燈九盞

右奉請寅星官降赴俯賜領納使攻必剋擊

必勝捷謹狀

出星道途通達宜用定日辰時

酒二盞 肉飯食二分 狀紙三張

錢財一貼 燈兩盞 香一炷

右奉請出星官降臨就座伏願無所滯礙道

途通達謹狀

定星安家保宅宜用平日戌時

羊肉炙五弗 酒五盞 狀紙五張

紙錢一貼 燈一盞 香一炷

右奉請定星官降臨受納伏願宅舍安寧祿

祜延生謹狀

瑞星應夢用天赦日亥時

酒七盞 鹿脯七椀 狀紙七張

紅絲二尺 紙錢七貼 燈二盞

香一炷

右奉請瑞星官應夢賢聖以將福祿謹狀

元星求大官宜用巳日巳時

乳三椀 雜絲各少許 紙錢一貼

紙三張 筆三枝 香一炷

燈兩盞

右奉請元星官降臨領納伏願仕宦清吉言

發皆中謹狀

正星攝心愜意用壬午日丑時

乳粥四椀 雜菓子四椀 酒四盞

香燈各四

右奉請正星官降臨領受伏願所未稱意謹

狀

顯星官祈官求名宜用丙子日亥時

肉飯一分 紙錢一束 狀紙一張

香燈各一 筆一枝

右奉請顯星官降臨領受伏願祈官必應求

名必遂謹狀

月星祈陰德宜用寅日子時

酒三盞 狀紙四張 白練素三尺

素飯三分 香一炷 錢財十五貼

燈一盞

右奉請月星官降赴領受伏願所祈必應謹

狀

輔星安賤口宜用辰日戌時

乳七盞 燈一盞 紙錢十三貼

香一炷

右奉請輔星官降赴領受伏願賤類福壽謹

狀

大白星祈方面主不揀日大凡申酉日為妙

汗衫半臂一 衫一 袴一

袜肚一 襪一 棍一

已上並須三歲孩子樣造

右奉請大白星官降臨領受前件物并食酒

乳等伏乞令祈官職必克所請謹狀

燈席 燈 燈

燈酒一滿碗乳一碗

燈乳粥一椀飯一椀
燈乳餅一錢財隨意
燈狀紙二十張香三炷
燈席燈燈燈

以前件鋪設但依所畫字處著祭物直須嚴
潔勿令前有猪狗及腥等物所排比尤宜在
意所求必剋伏慮未備者更備錄立成奏狀
儀範如後

召啓十方一切得道應感神明某年某月某
日州縣鄉里弟子某甲就某處奏納某星官
君錢求某福今正爾燒香啓告願靈聖降下
令臣所啓上達某星官前便執刀解穢云

謹請東方青龍真氣入吾水中
謹請南方赤龍真氣入吾水中
謹請西方白龍真氣入吾水中
謹請北方黑龍真氣入吾水中
謹請中央黃龍真氣入吾水中
謹請東方木官解穢吏九人
謹請南方火官解穢吏三人
謹請西方金官解穢吏七人

謹請北方水官解穢吏五人

謹請中央土官解穢吏十二人

謹請天上地下解穢吏各十二人

謹請解穢玉童洗院玉女香湯使者請解天
穢地穢人穢鬼穢沉屍白骨等穢但眼之所
視耳之所聞連令大穢歸海小穢歸江不得
遲遲當吾神氣者死背吾神氣者亡一穢不
去者斬付魁魁急急如律令捨香三遍上香
第一上香供養南斗星官第二上香供養北
斗星官第三上香供養十方一切得道
奏請某星官慈悲降臨領受微禮上香上酒
再拜

臣聞至理幽冥啓必應感謹有文狀理宜申
奏宣讀文狀如此三遍訖燒錢及雜果子撒
了再拜祝

右隨官並請沾賴以同歡悅某以卑微非薄
仰蒙降臨不勝忻悚臣向來所請情狀伏願
采納記錄詞誠臣以愚昧不閑儀範啓言煩
雜忤忤
威靈並乞矜恕克如所願再拜奉送

諸神祝文

第一上香供養南斗星官第二上香供養北
斗星官第三上香供養一切得道

玉華散景金鑪起烟香雲密羅上衝九天侍
香玉女上聞帝前今臣長生永為真仙所啓
所請咸乞如言年四

又云隔居小人好道求靈常見尊儀願賜長
生百二十年無諸灾瘴敗中得成危中得安
死中行生應住宅吉家春安平如願之日即
不勝虔懇之至稽首歡喜

次宣狀三遍

次念北斗呪七遍

奏請某星官慈悲降臨領受微禮臣聞至理
幽冥啓必應感謹有文狀理宜申奏次燒錢
及狀灑酒撒菓

右隨官並請沾賴以同歡悅臣以卑微輒申
菲薄仰蒙降臨不勝忻悚臣向來所請情
狀伏願採納記錄詞誠臣以愚昧不閑儀範啓
言煩雜忤忤
威靈並乞矜恕克如所願再拜奉送

背建向破覆斗


大月拇大指在前腰上及先進左足步之動

岡


小月拇小指在前腰上及先進右足步之動

岡

大月禹步先左



小月禹步先右



天老神光經

鬼谷子天髓靈文卷上

第五

夫水滌洞主鬼谷子祕密天文大道測天地之機曉造化之本天生真性逐嗜慾而迷不知生死難曉幽微之理道德陰符總明大道之機照夜內丹並是聖人之道夫在世凡夫迷惑真性不達真理故名異術乃祕之初以傳孫子龐公如後學之人習吾真法行之皆得避難逃生免死凡世憂煎逼迫免山河水起之厄免刀劍劫賊之厄免生鬼鬼聚之厄免狂鬼呪詛之厄免百萬軍陣之厄免水火盜賊之厄夫吾祕密天文者名為六天正訣又名六神文又名隱形藏體之術又名驅神入室之術又名鬼遊三界之經又名水滌幽微之教又名超脫生死之論此吾教法之內有真訣神符第一隱形藏體符第二驅神入室符第三鬼遊三界符第四超脫生死符第五火假四大符第六周天隱迹閉形符或在世修行之人收吾正法真經習吾真教達吾糟粕者須是淨心淨性嚴持香火于年通運違擇良辰吉日善心之時須是志心謹具香

燈嚴持齋戒朱書神符默持神呪四十九日神符即顯應矣

若在世男女收吾大訣天書者須是虔誠志心持意欲傳授者須用結壇威儀有三等壇上等結壇授持法者須用五方羅五段各長四十九尺玉環四十九對鏡四十九面正青紅同心四十九付燈四十九盞錢馬食各四十九付中等而結壇以授持法者用五方羅五段各長三丈六尺金環三十六對鏡三十六面正青皂同心三十六付燈三十六盞錢馬食各三十六分下等結壇授持法者用五方羅五段各長二十四尺銀環二十四對鏡二十四面正紫皂同心二十四付燈二十四盞錢馬食各二十四分

右件三等授持法者傳授金櫃藏秘如行此法須是揀擇運通年達好日良辰方可作壇持法不虛矣

隱形藏體符

